



الثقافة الوطنية

عيونك سكة الفقرا

بحقوق الطبع محفوظة

عيونك سكة الفقرا
الطبعة الأولى ١٩٨٤



مطبوعات الثقافة الوطنية

٣٤٥ شارع بورسعيد - تلغون : ٩١١٣٢٥

عيونك سكة الفقرا



محمود الطويل

•
•
أنا الأديب وانتم أدرى
وعاشق الناس والخضره
لا عمرى طبلت ف حضره
ولا قلت حاضر للـنصاب

الله الله يا بلدى
ولا كنا صحاب

•

ينايـر

الدم يبروى الأرض تنبت زهرة فل
والزهرة حريق
ف عيون الطفل وننى عيون الطفل برىء
وجرىء
والليل ان زاد
فى بلدنا سواد
راح تفضل مصر ينايـر كف تشاور ع الجلال

وتطالب بالاعدام
خطوه لقدام
دانا ح افضل أحلم بيكى واشوف
الشمس الطالعہ على المكشوف
بتعلق ف وش المال الداير فى الاسواق
ختاق للضى
لكن القدم الحافيه تدب تواكب نبض القلب ..
.. وتعلن إن الشارع حى
ولا زى
الإيد القابضه سلاحها بعنف
ولا زى الحرف
إن لف ييلضم صف ويفتح سكه لبكره الجى
بالغصب عن الزنازين
وخيانة الوالى وكل بطانته حدادى القصر كلاب عابدين

دا برغم الموت الناس زاحفين
وبرغم الموت
في رحم الأرض جنين
في رحم الأرض جنين

يوليو ٧٩



ريما

اتمشكحى يا ريما واجرى
إرعى
إفتحى البرجاس ..
خلاص ..
يا ريما نامى اتسلطحى
شفطوا المرق ؟
إقبضى تمن العرق

لا تستحي وان حتى كار
لا حتفري مره ولا يا ريم مره حتجرحي
ماله الدولار ؟
سيد العماله
والعموله
والبطوله الزايفه فوق دم الزماله
والتجاره بالأصالة
والدعارة ف أى صاله
واسمحي يا ريم أو لا تسمحي
بالطابور — ع البنك — يوم صرف الحواله
كل صناديق الزباله

يوليو ٧٩

أكيد بكره


وكل ما اطل
— أنا المصلوب على بابك
بأيدي الكل
يا عشقي ياللي أعتابك
طواها الذل
أضم الشمس وترابك
واموت في الضل

أموت ازاي وانا الشاهد على بكره
أنا الشعب اللي حاضن همه بالفكره
وانا الحُضره
أنا الفاس اللي دق وشق بطن الغيط
وانا في المصنع المكنه ..
وبرضه الزيت

أنا الرقه في بحر النيل
وباشرب مَيّتي عكره
وانا اللحن اللي في المواويل
وتنسيني ولا ذكرى
خساره يا مصر
خساره يا مصر ياللي القصر يسييكي

ويقتلني
— أنا الى عشق نور الشمس ف عنيكي
مبهلنى —
لكين بكرة
أكيد بكرة
أكيد ليكي
وحنفتي
لكل الناس
بكل حماس
ونزرع في القلوب زهره
ونجزر رقبة الحراس

اغسطس ٧٩



بناديلك

قد إيه بارتاح أنا
لحظة ما أقابل بسمتك
وبكون شديد
لما بامد الخطوه وامشى ف سكتك
يا عشقى يالى حبك ادانى
وخذ منى السنين
ما بين الحلم والخطوه

وبين الكلمة والزنازين
أنا ماشى بناديلك
ما بَلَقاشى ..
أغنيك

مشيت الليل
بطول الليل
لكين الليل ما وصلنى
واتارى الفجر ف عيوى
خيال ..
والجرح ما دبلنى
وشفت الناس
فقارى تموت على قوتها
وناس بتعلى ف بيوتها

وناس راحت فدا صوتها
وناس خاينين
وناس تحت التراب نُوها
بتغزل فجر فوق نُوها
ومهما الغدر بينوها
أكيد واصلين

وانا ..
يومي الى جاي لسه ماخطرشي
وبكره بذره حتنبت مع الطالعين
صلاة الزين
صلاة الزين على ولادك
شداد جامدين
صلاة الزين

وضربة تطّخ جلادك
تزعج الشين
ياست الكل
ياعروسه
يا شابه يالى كحل العين

بناديلك
أنا الى في العروق نيلك
ودمي زيت قناديلك
وانا العاشق ف قرآنك
أنا جيلك
قوليلي فين أنا جيلك
وانا جيلك
أوقى الدين

ونزرع شمسنا ضحكاه
على شفة وليد أخضر
تدفي الأرض وتفتح زهور أكثر
وتيجي مصر تتمخطر
طهور الواد
ويبقى الكف متحنى
وندعى الأهل
ونغنى
حباينا اللى بتهى
نرش الملح والسكر
وحصوه ف عين

سبتمبر ٧٩



الباب العالى
سراى عابديــــن

فرمان سلطانى

الى نجم

إخرس لاجبس
وارمى ف سجن القلعه واتريس
حد معصلج مخه مترس ؟؟
؟؟؟؟؟

إنتوا سكتوا اما اتوليت
لما سافرت القدس وجيت
لما مضيت

(يقصد يلحق جزمة كارتير

وانتوا كلاب)

هم الواحد فيكم بطنه ورد الباب

شعب ييغرق في التهليس

الى بتسى هدومها ف سوهو

والى ييحلّم قال بباريس

والى استورد في الافكار

سوسه يشعلل فيها النار

وانا مش ح ارحم ناس مهاويس

دانا مش هاوى ومش مكسوف

صعب انا واقتل يومى الوف

مستر ييجن ..

ماله ان كان ييقاله سفاره ؟

شىء راح ييسط كارتير جدا

واحنا نطوف
م احنا كما ح نبطل نذن
على الكعبه هناك تنفعهم
أو ترفعهم
بكره نشوف

قصره حييجي حدانا سفير
واللى حينطق
ييقى يحفر قبره بإيده ..
وراسه تطير

الصهيونى فى مصر حايه
(الصهيونى فى مصر حايه
يعنى حيدس فوقكوا بجزمه)

واللی حیعمل منکم أزمه ؟
مش مقبول ..
وحسابه معایا

مستر ییجن یرفع علمه
وانتو اتلموا

(یعنی تطاطوا تهزوا الدیل)

آلا الوهل
الهل
الهل

۲۶ فبرایر ۸۰

تاتا .. تاتا

يومك نُونو محندق زى الفرحة السارحة ف ننى العين
والضحكة الطالعه تهز الشفه وتغمز فى الخدين
زى السينه الطالّه بخوف
والخطوه التاتا التاتا وكنت بتحبى وانا الملهوف
باحلم بك بكره تشب وتلا الشوف
يا وليدى وتعرق تحبل أرض النيل بالخير
كان جدك يروى الأرض بعمره ...
وعمر ما عقر دقنه طحين

وارقيق من عين بتعس
وايدين بتدق الباب في الليل وتقص
بارقيق من ناس بتحس لكن بتخاف
ولا عمر الترس الداير يرحم ..
راس بتطاطى وكف تلين

واحكيلك عن والديك
يا وليدى عساك تشتد
ورفاق من حصن عياها الدافى انخطفت عز البرد
عن طفل بينزف حيرته سؤال ..
كلمة بابا تخلص أذان الفجر حزين

•
•
كان يرسم حرف الكلمة رغيـف وكتاب
ويـحلم يـزرع لـاجلك عود لـبـلاب
عـصـفـور مـتـحـنـى الرـيش
سـاعـتـن غـنـى ..
مات مـتـكـفـن بـالـخـراطـيش

•
•
يناير ٨١

الليل

وكانت الحاره والدايره على الأرض الترابيه
عيال بتشيب
تنبت دقتهم بدرى على السحنه النحاسيه
يدور الواد
ومن جوعه
بتسبق كلمته دموعه
ما فاتش — يقول — عليكوا الديب ؟؟
فاتتش دبابه سحلاوى ؟؟

وفى الشباك
عيون بتطل للشباك
تقول سحر العين كاوى
أنا يا حلوه جاى بكره
ويوم الفرح مش حيفيب


وفوق من كومة الكراكيب
وليد يصرخ وبيرفص
فى حجر امه الى بتهنن
تهز الحجر وتغنى
تحنن بزها ولا فيش
تقول ترزق بلقمة عيش
أكيد بكره ...
يامين حيعيش !؟!؟.

ويفضل بكره متعلق
من الشريان على زويله
وتفضل لعبة الأطفال
تُراى انتى يا ضليله
وعايزين مين؟؟؟!

يدب العسكرى المسعور
على الأرض الى صابره سنين
تغور الضحكه م الشفه
ويسود النهار فى العين
يحط الموت على الابواب

تلف النشوه بالخاين
وتمرجح حبال برقاب
تجدّر في التراب بذره
حتفتح بصفّر وناب
تشد عروقها وتفتح بصفّر وناب
بتفتّح بصفّر وناب

فبراير ٨١



تهنئه

مهما الينه يائوكه وفوه
خليك صاحى وفتح عينك
ألا ان نمت يا نونتى هوه
دخل الخمر بينى وبينك
عمل حيطان السجن ويرمى بصله عليك

كنت انا وانت وماما تلاته
عش صغـر زيك نونـو
لسه برغم القهر تلاته
مهما القدر ومهما يخونوا
بالمح شمس الجى الطالع ف ننى عنيك

بافرح لما تهل عليه
وانت بتجى بلاطه بلاطه
د انت بتكبر قوى ف عيه
لما بتنطق بلدى وتاتا
دب الخطره لبكره وتبت قوى بإديك
دب الخطره لبكره وتبت قوى بإديك

ابريل ٨١

بالإعدام

كان في بلدنا غول أنتيكا
إسود زى الليلى والهم
لاجل يوس رجلين أمريكا
يشفط عرق الناس والدم

لما النار بتطق في عينه
بيفكر محناش كاشفينه
العرشه في إيداه ورجلينه
بسلامته فاكزنا حتتخيم

الكلب يـعشق أمـريـكا
بيـطاطـى ولا مره يشم
قتل الشهدا ديسكو وسيكا
ويهوذا بقى الخال والممم

الخاين باع نيلنا ودينه
ييصم ويمرغ ف جبينه
حيروح فين واحنا محاصرينه
حيموت متدهول بالدم

٣٠ مايو ٨١

ع الطريق

وقت الأذان
إنخطف
ما لحقش حتى ييوس مراته
كلمة الحب الأمينه
أو يتسم لابنه الى في المهد الرضيع
أو يسقى عود الورد لائحضر في الجنينه
الى غارسه للربيع

ما لحقش يتلاحظ كلامه أو سكاتة
وقت الأذان
من غير ما يشرب شايه ويولع سيجاره
أو يودع الجيزان

الحکم جاهز قبل تسوید الورق
دیزل بیطوی الخط نہایتہ
من قبل نطق الحکم « زهران » اتشلق

مليون صباح
ييمر منزوف الجراح
« زهران » في جبل المشنقه
كان يوم « خميس »
و ف يوم « صلاح »

وف يوم رصاصة الغدر ما صدت « لويس »
قَبْلِن طلوعه للبراح
واشهد يا « شهدى » يالى راح
« زهران » فى جبل المشنقه
ولا ماتش من حز الحبال
(م الجبن فى صدور الرجال)

المجد للشعب اللى نايـم فى العسل
للمصلوبين بايديـن يهوذا العصر ..
سفاح الورود
وللى كل يوم مولود
المجد للمرصود لكف الموت ليوم ما انقتل
ما ضغطش كفه مره ف زناد البارود

•
•
إروى بدمك قبض الريح
طول ما بتعل جيوب أسياك
عادش مكان لاتنين فى بلادك
أشقى نفسك ..
أو جلادك

يونيو — سبتمبر ٨١



29

عيونك سكة الفقرا

عيونك مغرب الأيام
مراكب حزن
يسافرها الى واخدين الهموم بالخصن
يطول الليل
لا مرسى ولا يشق السما صارى
نتوه فى الليل
لا همسه ولا غير الأنى دارى

عيدان الورد دبلانه
ورق أصفر تزيجه الريح
كفوف فى الصهد عرقانه
وعدمانه
وناس مجاريج
لا بتفلسف الموضوع
ولا تكفر برب الجوع
ولا بتكل
جيوش بتهل ع البوابه كل صباح
تدق الكارت وتعدى
طابور الهم لم يرتاح
رحايه ودايه من بدرى
مين يقدر يزوغ ..
يجرى ..

ومين ملحق
أبصر لفوق
يجيني الرد من تحت التروس دامي
ألم الدم ف كفوفى ..
... تاريخ مسروق
تصد هدير تروس مكن العنابر صرخه بتطالب
سؤال طائر
جواب مشنوق
تبرطع عسكر الأمن بغاوتها
وهات بالشوم
حلوق مطلقه كلمتها
لوارى تشيل
زنازين السجون لم مره قالت بس للحراس
ولا غمر السجون
بتقتل حس جوه الناس

.....
.....
تعالى فى دفا المثاريس
تعالى نرسم المشوار
أغانى . حب . زفه . عريس
عروسه . ضحكه . طير . أزهار
كهارب كل حاره ودار
ملاعب ..
مسطره ..
كراريس .
مغازل ..
شرشره ..
قواديس .



خنادق ..
بندقية ونار
عيونك سكة الفقرا
طريق العنف
والأشعار

ديسمبر ٨١ — يناير ٨٢

(.....)

عيونك صباحى الى ضاع من زمان
وفجأة التقتى فى مرمى العيون
شموس دافيه هلت بتملا المكان
تبدد ضلامه وبرد السكون
خدتنى لييتا المندق لقيته ملان بالعيال
بتسرح وتمرح ف حضن امهاتها وعين الرجال
لحت الى بكره يحضّر جنابن وعشت الخيال



ما هو انتى الى كنتى البدايه النهايه
وانتى الحنان والأمان والرحايه
نفوت الزمان والمكان والمشاعر
ونفضل قصيده
حكايتهك معايا

٣٠ يناير ٨٢

إِنتظار

الليل هموم
وغيوم
وموت
ضل المشانق ع اليبان
والخوف عيون عسكر تفوت
مسعوره لم خلّت مكان
واحنا على سكة سفر

• والليل مشرق كل دار
• والكاس مازال
— ذل الخيانة — و ع الجدار
جثة شعار
الانتظار

أهلاً
أهلاً بثوار المكاتب بالدفوف بيدقوا زار
إحنا جميعاً فى انتظار
يا موطنى المصلوب بتنزف قهر فوق ضهر الرغيف
يا طفل دبلان العيون
أصفر
نحيف
•
•

إحنا جميعاً فى انتظار
والصمت عار
الصمت عار
الصمت عار

مارس ٨٢

اللقاء مواعيد

ودار الشاي على القاعدين حدا التوته
مع الدخان
على الأرض المندية
وجوه م الصخر منحوته
بطمي النيل مرويّه
وفيها حنان
برغم القسوه والأحزان

عيون الجد حدوته
وضحك الطفل زغروته
تغازل ع الزراعيه
صبايا ف دايرة السامر
وتتآمر على الجدعان
شقاه في العيال غيّه
يقول بابا
يقول يامه
دفا بيقابل اللّمه
في عز الهيصه واللمه
وبالأحضان
كفوف تلمس كفوف بأمان
وحنيه
وكان ياما كان

وفي الإمكان
ييحكي الجدد عن « زهران »
ويوم الشنق كانت صعب وقفاته

— الخلق صابها الحرس
والصمت لف الحرس
والغدر ربح مسموم
مسعود بطعم الجثث
الحبل كان مقتول
« زهران » بعرض وطول
كام مره مات مقتول
من يومها يا أولاد
عائشين نشوف جلاد
رايح وجاي جلاد


يميل الجدد ويسمل ويرفع قلة الميه

ينط ف حجره

— اسقيني يا جدى وقوللى فين « زهران »
وابويا فين بقاله زمان
وهات قرشين اجيب من خضره عسلية
وحديك انت ففتوته
ولامى كان
على الدكان يطير حافى
وصوت الجدد بيلاحقه

— ابوه من صغره متعافى
أنا شيلته على كتافى
وغنينا الكلام نيلى حليب صافى
ودافى كيف لقا الخلان
تهز السامر المواويل
بنات بكفوف محنيه

• تغنى للصنایعیه ورا القضبان
• — یاعشق طارح فی البلد
• مهما انجلد
• حتا یقابلنا الصباح
• رغم الجراح
• والسجن والسجان
• نغنى واللقا مواعید
• نغنى لعبه للأطفال وهدمه جدیده یوم العید
• نغنى لقمه للعواجیز اذا ما العمر هَدَ الإید
• نغنى المجد للانسان
• نغنى جنینه للعشاق
• وزینه لكل مین مشتاق
• وصوت زغارید
• وتهیه



يدق الجذ بكفوفه مع الألمان
— والله زمان يا مصريه

ويهمس لابن أخوه حمدان

— وحق الخضره مايم الملال إلا تكون جوزها
— يا حاج استنى لما السجن يفتح بابيه للأحباب
— لا عمر السجن يستكفى ..
ولا حيجه عود لبلاب

ابريل ٨٢

بيروت

بيروت
ماعادش إلا الموت

البيانات الذليله
لحكومات العميله
والمعارضه كل ليله
منقشه وبعدين سكوت
بيروت
ماعادش الا الموت

كلنا رضىنا المهانه
واكتفيننا بالإدانسه
كلهم حكاهم خيانه
دايره بتجهز تابوت
بيروت
ماعادش الا الموت

الدماء أنهار تسيل
إنما المشوار طويل
والى حاضنين إسرائيل
هَمّا دول الاخطبوط
بيروت
ماعادش الا الموت

إحنا أصحاب القضية
والشعب هيه اللي جايه
والمقاومه لسه حيه
تحت أنقاض بيروت
بيروت
انتى الحياه والموت
انتى الحياه والموت

يونيو ٨٢

برقيه

عيونك من ورا الرشاش حكايه
ما تموتيش
واعذريني لو مَجيش
من ورا القضبان باقول
أنا المقتول على باب الحياه
ومحاكم التفتيش

بينى وبينك عسكر السلطان وذُلَّى
من بين محور الدم بتطلَّى
فلسطينيه بتهل
شمس ودفا فى موطن الأموات

عيونك من ورا الرشاش ختام
ياجرح نازف ع الدوام
يبدأ طريقك من هنا
من ساحة الإعدام
يبدأ طريقك من هنا
من ساحة الإعدام

يونيو ٨٢



بحورالدم

مين يشتري صمتي
وججمة الفدائي
والأساور
أو يجبر الجثث القتيله تقوم
تهاجر
أو يقطع الكف ان تشاور ع اللى خان
ياموطنى المتهان

قتلوني يا وطن المباخر
والمفاخر
والديدان
والنفط والإعلان
قتلوني من ضمن الشروط
في القاهرة وبيروت

لّوح يا منديل الوداع
باسم الجياع
والدم والمنفى وأحلام الصغار
بوس لى جبينهم والدرع
وارسم علامة لانتصار
يا ثوره حتى النصر يا أظهر صمود
يا ثوره حتى النصر يا نور النهار

منفى من المنفى وللمنفى تعود
يا كف متعطر بارود
« التل » فى كل العواصم ..
.. والعفن .. والكذب ..
.. والحكام سجود
واتحدى حاكم ينكشف
عوره
بلا نجمة داود

اطلعوا من كل بيت فى كل حاره
وارصدوهم
فى الملاهى .. ارصدوهم
فى الشوارع .. ارصدوهم
وارصدوهم فى الفنادق

في الحراسات الحويطة
في السفاره
انتهى عصر المتافات والحجاره
والى ما حلتوش بنادق
صنعه المولوتوف بسيطه

اواخر اغسطس ٨٢



أَبُوح

أَبُوح يَا أَبُوح
عِلْمُ الْعَرَبِ مَدْبُوح

مدبوح بقاله سنين
يا حسرة الملايين
واحد من الخائنين
ييجى وغيره يروح

عطشان يا بحر النيل
يا راوى كل سبيل
يا مخضّر المواويل
وانت حزين مجروح

يجن مع السلطان
يقسموا الأوطان
باق الملوك فى رهان
على دمناء المسفوح

يدك على زنا—ادك
خلى الب—ارود زادك
يا موطنى ميم—ادك
للشمس لما تـلـوح

نفدى الوطن بالروح
نفدى الوطن بالروح

سبتمبر ٨٢

مواويل

عيونك لو تشيل الخوف
غيطان غلّه جنّين ورد
أغنيّها ليلّاق واشوف
زمان ولّي لسابع جد
الاقّ الحال على دا الحال
مايين عسكر وراس المال
يزيد القهر بالخالق
تعلّى رنة الموال

ياليل ياعين
ياعيني ياليل
أكم تغسل يا بجر النيل
وكام بتشيل
وكام تجرى يا نيل وتزيل
خيانة كل كلب ذليل
وتبقى الموجه هذاره
سوا والخلق محتاره
سوا والخلق ليها دليل

« عرايى » كان على فرسه أبو الفرسان
وكان أول
وفى الثانى اتشنىق « زهران »
وفى الثالث وفى الرابع ..

يفتح زهرنا ألوان
وكانت مصر صوت « خالد »
يرتل سورة الانسان
« نجيس » . « حداد » . « خليل » . « عثمان »
« لويس » والضرب في المليون
دما بتسيل
تقول مواويل
وتدفع حصّة الأوطان

أنا وانتى حكاية من حكاوى الناس
تنديها .. تداريها عن الحراس
ونفزل من رموش العين غناوينا
تصحصح ضحكة الأطفال وتدينا
أمل في الجوى

وشمس وضى
وتمسح عن جبين الناس تعب يومهم
وتجدل من خطى المجموع طريق يومهم
مسيرة أهل مصر الجأى أكيد يومهم
ربيع أخضر
غيطان القمح والياسمين
ونيل عنبر
بلا قلعه ..
... ولا زنازين

يناير ٨٣

٧٨

الفهرس

٤٣	عيونك سكة الفقرا	٦	يناير
٤٨	(.....)	١٠	ربما
٥٠	إنتظار	١٢	أكيد بكرة
٥٣	اللقا مواعيد	١٦	بناديلك
٦٠	بيروت	٢٢	فرمان سلطاني
٦٣	برقيه	٢٦	تاتا ... تاتا
٦٦	بحور الدم	٢٩	الليل
٧١	أُبُوح	٣٤	تهنيه
٧٥	مواويل	٣٦	بالاعدام
		٣٨	ع الطريق

